



INTRODUCZIUN

DA SUR MARCUS FLURY

Simon Pieder era in pescadur da professiun. Mo quella notg ein las reits stadas vitas ed el sa ch'ei ha atgnamein buca senn da vuler empruar aunc inaga, surtut buca durant il di nua ch'ils pèschs ein plitost giu el profund dil lag.

En quella situaziun damonda Jesus da Pieder dad ir aunc inaga viado sil lag ed empruar. Jesus damonda quei da Pieder suenter ch'el ha instruiu las fuolas dalla barca anò. Ei vesa ora sco sch'el less ussa metter sin emprova la cardientscha da Pieder. Lez sco versau pescadur di a Jesus: «Tenor nossas experientschas ha ei buca senn.» Mo el di era: «Sin tiu plaid vi jeu fierer ora las reits» ed el navighescha aunc inaga viado e la raccolta ei gronda. La fidonza en Jesus ha purtau success.

Lucas raquenta quei eveniment per far curascha alla giuvna Baselgia che piteva sut persecuziuns, che veva piars empau il slonsch dils emprems dis e che veva buca quei success ch'ella vess giu bugen. Als emprems cartents vegn cheutras detg: Buca schei pender la bratscha. Mei viado ed empruei sil plaid da Jesus enzatgei che va forsa buc a prau cun vossas experientschas. Quei di el era a nus!

EVANGELI

Lc 5,1–11

¹In di sefultscheva il pievel entuorn el per tedlar il plaid da Diu, e Jesus steva alla riva dil lag da Gennesaret. ²Cheu vesa el duas barcas alla riva dil lag. Ils pescadurs eran descendi e lavavan las reits.

³El va en ina dallas barcas che udeva a Simon e supplichescha el da navigar in tschancun naven dalla riva. Lu sesa el ed instruescha las fuolas dalla barca ano.

⁴Havend finiu da plidar, di el a Simon: Navighescha viado sigl ault dalla mar; leu ferì o vossas reits per la pesca! ⁵Cheu rispunda Simon ad el: Mussader, l'entira notg essan nus sestentai e vein pigliau nuot.

Mo sin tiu plaid vi jeu fierer ora las reits. ⁶Ed ei fan quei e peglian in grond diember pèschs. Lur reits entscheivan gia a scarpas. ⁷Cheu dattan ei in segn a lur cumpogns da vegnir e gidar. Quels vegnan, ed els empleinan domisduas barcas, aschizun ch'ellas bunamein sfundran.

⁸Vesend quei, sefiera Simon Pieder avon ils peis da Jesus e di: Va naven da mei, Segner, pertgei jeu sun in carstgaun puccont!

⁹Tema veva surpriu el e tut ses cumpogns pervia dalla pescada ch'els vevan fatg; ¹⁰medemamein era Giachen e Gion, ils fegls da Zebedeus, che fuvan cun Simon. Mo Jesus di a Simon: Buca tema! Dad ussa naven vegns ti ad esser pescadur da carstgauns.

¹¹Ed els han tratg las barcas a riva, han bandunau tut ed ein suandai el.